

per questa via de Muldavia. Et questo jo intisi da poi che havi serito a la Signoria vostra. E da poi *etiam* intisi, *qualiter* la ambasciaria del signor turco vegniva in questa terra, deliberai de sottrazer da lui et intender quanto poteva de le cose turchesche. Et atrovandosse qui per transito, con li ambasciatori de Rossia, uno mio amicissimo, lo qual sa talian, greco e turchesco, e à mojer e fioli a Venetia, lo quale chiama per nome Nicolò Leondari, et ha molti parenti in Constantinopoli e gran maistri, jo missi ordine con lui, che zonto che serà el dito ambasciator, el vadi a visitar, fenzendo dimandar de li parenti, domesticarse con lui, et intender quello el potese, intrando a rasonar de diverse cose, fenzendo *etiam* esser inimicissimo di la Signoria vostra, *tamen* io sono esperto, lui esser servitor fidelissimo de quella *etc.* A dì 28 dil passato el prefato ambasciator zonze in questa terra con cavali 80; lo qual per nome se dimanda Sina bei, cosin di Charzeg bassà e de quello, che fo a Venecia in tempo de la perdeda de Modon. A dì 29 dito andò a la visitation de questo signor con gran pompa; erano 40, vestiti de pano d'oro, e li altri tuti di seda, e ben in hordine. Ritornato che 'l fo a la stantia, el prefato Nicolò, sequendo l'ordine, *ut supra*, andò a visitarlo, et domesticose con lui, e poi ritornò el zorno sequente, et comenzò dimandar da novo de le cose de guerra, sì da mar come da terra. E diseli per prima, come el suo signor era grandemente molestato in la Natolia da quelli de Perssia, i qual se dimanda Sophis, *idest* sapienti de la leze machometana; et questo fano, dicendo che 'l turco non serva la leze sua. E dice, che sono acampadi in la Natolia, con cavali da 60 in 70 milia, et àno preso certe città e molti castelli e vilazi. Et che 'l suo signor li haveva mandato contra uno bassà, con cavali 40 milia, lo qual era stà roto da l'horò *etc.* Et che ancora el caraman li fa gran guerra e molestia pur da quelle parte; et come lo imperator Gurgura, cerchasso, *etiam* li fa gran guerra *etc.* Et che è el morbo grande in Constantinopoli e in Andernopoli, e gran carestia; a Constantinopoli ne muor 200 al zorno, et in Andernopoli più di 200. Diseli *etiam*, come el suo signor era molestato da le bande de la majestà de re de Hongaria, et *maxime* dal signor duca Zuane Corvino, lo qual li haveva sachizato et brusato più de 400 vilazi e molti castelli e certe terre. E diseli, che 'l suo signor era stà in pratica de far pase con la Signoria vostra; e che quella non n' à voluto assen-

361
tir a le cose che 'l dimandava, tra le qual disse esser questa, che 'l voleva esser in libertà de far

guera a la majestà del re di Hongaria; et che se pur questa sola li fosse stà concessa per la Signoria vostra, che facilmente se pacificava con quella *etc.* Dimandoli poi di le cosse maritime, li rispose havemo perso Santa Maura; e che el suo signor meteva in ordine molta armata de galie grosse e sotil, fuste e palandarie; e che non voleva più armar nave; et come in Trabesonda haveva fato far galie sotil numero 200; e che Camali era a Galipoli al governo de la armata; Erichi era andato fuora del streto, con fuste 25, a li danni de li sudditi di la Signoria vostra e d' altri christiani; et che *omnino* el suo signor vol mandar la sua armata al tempo novo. El dito Nicolò dimandò quanto numero de velle serà quella; li rispose serà in tuto galie 300, e, con le fuste e palandarie, serano velle 500. E diseli, che il suo signor non si curava de Napoli nè de Candia, ma che *infallanter* el vol mandar quella armata a Corfù e far ogni suo sforzo de averlo, digando: Come averò Corfù serò signor de Levante e de ponente; Jesu Christo nostro redemptor lo sconfonda avanti. *Item*, el terzo zorno ditto Nicolò ritornò da lui come amico, e dimandò per qual causa andava in Polonia. Risposeli: lo vado a confirmar li capitoli de la pase tra el mio signor e la majestà del re de Polonia, perchè in questi zorni passati el re à mandato al nostro signor do ambasciarie, con molti presenti, et con li capitoli, a dimandar la pase *etc.* La qualcosa, *serenissime princeps*, la rason me persuade dover creder, per esser in guerra la majestà di ditto re con suo suosero, ducha Zuane de Moscovia, et anche per esser inimichato con questo illustrissimo signor, duca Stephano de Moldavia, per averli tolto molti castelli e vile, como per le altre mie significai a la Signoria vostra. Et perchè questo signor duca ha una fiola in Moscovia, et uno nepote, fiol de quella, al qual apartien el duchato de Moscovia e la signoria de Rossia, la majestà de dito re ha dubitato, che questo signor, per esser inimicato con lui, deba favorir quello de Rossia, como parente; per la qual causa ha dubitato, *etiam* che 'l se acordasse con el turco a li danni soi *etc.* *Item*, el dito ambasciator disse a Nicolò ancora queste parole: Sapi, che 'l nostro signor à fato volentiera pase con questo re per do rason: la prima che 'l dubitava molto, che questo signor de Moldavia se dovesse acordar con lui e molestar da questa parte; la seconda, che vol veder se per la via de questo re potrà far remover da la impresa suo fratello re de Ongaria, et se non lo potrà remover, el farà grande exercito per terra contra de lui, et *omnino* se vol